



Inatsisartunut ilaasortaq Jens NapātōK', Naleraq
Inatsisartut@inatsisartut.gl

**Allakkat nassiussallu kinguaattoortarneri pillugit § 37 naapertorlugu
apeqqummut 2025-229-mut akissut**

Asasara Jens NapātōK'

Ulloq: 15-01-2026
Suliap normua: 2025 -
26690
ID. nr.: 79516657

Inatsisartut Suleriaasissaanni § 37 naapertorlugu Naalakkersuisunut allakkat
nassiussallu kinguaattoortarneri pillugit apeqquteqarsimavutit. Apeqqutitit uannit
akisassanngorlugit innersuunneqarput. Apeqqutigineqartut tullinnguuttuni
ataasiakkaarlugit uteqqinneqarput akiortorneqarlutillu.

Postboks 909
3900 Nuuk
Oqa.: (+299) 34 50 00
E-mail: box909@nanoq.gl
www.naalakkersuisut.gl

**Apeqqut 1: Allakkat nassiussallu nunatta iluani tamarmi, pingaartumillu
isorliunerusuni nunaqarfinnilu maannakkut annertuumik ajornartorsiutaallutik
kinguaattooqqanerujussuat pillugu Naalakkersuisut nassuiaateqarsinnaappat?**

Akissut: Allakkat pillugit Inatsisartut inatsisaat naapertorlugu allakkat poortukkallu
nassiussat Tusass A/S-imit kisimi isumagineqartarput, poortukkanulli allanut niuerfintut
nassiunneqartartunut tunngatillugu maleruagassaqarani.

Apeqqutigineqartut akissutissaqartissinnaajumallugit Ineqarnermut,
Attaveqaasersuutitut Isorliunerusunullu Naalakkersuisoqarfik akissutissat ilaanut
Tusass A/S-imut akissutissarsiortariaqarsimavoq. Tusass imatut ilisimatitsissuteqarpoq:

*"Allakkat poortukkallu nassiussat qaammatini kingullerni pingasuni
assartorniartarnerisa pisarnermit sivilunerusarsimani Tusassip
uppernarsarsinnaavaa. Tusass naapertorlugu tamanna Air Greenlandimi
assartuisarnermi atortunik nutaanik atuilersimanermik Nuummilu
mittarfiup timmisartunit angallavigineqarsinnaanerata
killilerneqarsimaneriniq aallaaveqarneruvoq."*

Air Greenland oqaaseqaatissaqarnerisut Ineqarnermut, Attaveqaasersuutitut
Isorliunerusunullu Naalakkersuisoqarfimmit aperineqarsimavoq.
Air Greenlandip ilisimatitsissutigaa Tusass A/S-ip oqaaseqaatissai Air Greenland A/S-
imit akuuffigineqarsimasut. Tamatuma saniatigut Air Greenland A/S-imit
erseqqissaatigineqarpoq assartuinermini killiffik december 2025-mili tamanut
erseqqissaatigineqareersimasoq.

Timmisartuussiffiusartuni poortukkanik nassiussanik kinguaattoortarnerit massakkut
atuunnersut suullu patsisaanersut Naalakkersuisut ilisimasaqarfiginngilaat.

Apequt 2: Nunami tamarmi innuttaasunut allakkatigut poortukkatigullu kiffartuunneqarnerup patajaallisarnissaa aamma piffissamik naapertuunnerusumik kiffartuussinissamut qulakkeerinninniarluni Naalakkersuisut suliniutinik pilersitsippat, imaluunniit aallartitsiniarlutik pilersaaruteqarpat?

Akissut: Ilaasunik angallassinerit allakkanik poortukkanillu nassiussisarnert ilaatillugit Naalakkersuisut sullissinissamik isumaqatigiissuteqarnikuupput. Allakkat poortikkallu nassiunneqartut qulakkiikkamik apuunneqartarnissaat siunertaralugu Naalakkersuisut kiffartuussinissamik isumaqatigiissuteqarfigisaq oqaloqatigaat. Kiffartuussinissamik isumaqatigiissuteqartarnerni ilaasunik assartuinerit siunertarineqarnerupput; assartuisartullu imatut pingaarnersiullutik tullerriaarisartussaallutik: 1) ilaasut, 2) allakkat nassiussat aammalu 3) assartuineq (tassalu poortukkat).

Ittoqqortoormiit eqqarsaatigalugu poortukkat uninngaannalersimasut ilaatigut assartorsinnaajumallugit sisamariarluni piaartumik timmisartuussisoqarnissaa siunertaralugu Norlandair Ineqarnermut, Attaveqaasersuutitut Isorliunerusunullu Naalakkersuisoqarfimmit december 2025-mi suleqatigineqarsimavoq.

KNI, Air Greenland, Royal Arctic Line, Greenland Airports kiisalu Naalakkersuisoqarfiit assartuinerimik pilersuinermillu akisussaaffeqartut Ineqarnermut, Attaveqaasersuutitut Isorliunerusunullu Naalakkersuisoqarfimmit 2/12-2025 ataatsimeeqatigineqarput. Ataatsimeeqatigiinnermi anguniarneqartoq pingarneq tassaavoq Tasiilap pilersorneqarnerata aaqqiiffigineqarnissaa kiisalu siunissaq ungasinnerusooq isigalugu suliffeqarfiit attaveqaasersuutitik suliaqartartut pitsaanerusumik ataqatigiissaarisalernissaat. Ataatsimiinnerup pineqartup ingerlanneqartariaqarsimaneranut suliffeqarfiit attaveqaasersuutitik suliaqartartut peqataasut pilersuineq assartuisarnerlu eqqarsaatigalugit ataqatigiissaakkamik pitsanngorsaatisanik ataatsimoorlutik suliaqalersimanerat.

Apequt 3: Qaqugu innuttaasut allakkatigut kiffartuunneqarneq nalinginnaanerusooq naatsorsuutigisinnaavaat, suullu Namminersorlutik Oqartussanit piumasaqaataappat Post Greenlandimit ajornartorsiutit ingerlatiinnarneqannginnissaat qulakkeerniarlugu?

Akissut: Allakkat nassiussat pissusissamissut ingerlaqqilernissaanut Tusass A/S ima ilisimatitsivoq:

"Oqaaseq "nalinginnaasumik allakkerineq" pineqartillugu tassani apeqqutaasarpooq sullitat naatsorsuutigisaat, tassanilu sila, teknikikkut pissutsit, assartuinissamut periarfissat timmisartuussinissanilu pingaarnersiuisimanerit apeqqutaasarlutik. Allakkanik poortukkanillu nassiussisarnermi piffissaq atorineqartartoq nalinginnaasunngoqqilerpoq, nassiussallu ingerlanerisa malinnaaffigisinnaalernissaaniut Track and Trace-p tamakkiisumik atulernissaa kisimi amigaataalluni."


Silaannakkut nassiussat assartorneqartarnerinut piffissat atorneqartut imaattut Tusass-
 imit nalunaarutigineqarput:

Poortukkanut silaannakkut nassiussanut piffissaq atorneqartartoq ukiuni 2024 aamma 2025-mi 1/10-mit 30/11-mut						
Illoqarfimmit	Illoqarfimmut	Piffissaq assartuinnermut atorneqartartoq ullut		Poortukkat amerlassusaat		Oqaaseqaatit
		2024	2025	2024	2025	
Nuuk	Upernavik	5	13	193	220	
Ilulissat	Upernavik	2	7	133	111	
Nuuk	Uummannaq	6	11	160	256	
Ilulissat	Uummannaq	4	5	79	68	
Ilulissat	Qaanaaq	4	12	42	13	
Nuuk	Tasiilaq	11	15	215	201	Allakkanik DK- imeersunik Icelandair Islandimit Kulusummut 1. oktober 2025 missaani assartuiunnaarpoq.
Nuuk	Qaqortoq	5	9	140	147	
Nuuk	Qeqertarsuaq	6	7	49	50	Ilulissat – Qeqertarsuaq piffissap ilaani Disko Linemit isumagineqartarpoq
Danmark	Ittoqqortoormiit	15	9	19	175	Skannerinermi kukkunerit 2024 / 19 pk. Poortukkat DK-imeersut Island aqqutigalugu Nerlerit Inaanut toqqaanartumik nassiunneqartarput.
Nuuk	Ittoqqortoormiit	16	13	15	50	Skannerinermi kukkunerit 2024 / 15 pk. Icelandair aqqutigalugu Nuummit nassiunneqartarput. Nuuk Airportimi x- ray kinguaattoornerit.

Allakkanik poortukkanillu kinguaattoorpallaarani nassiussisarnissamut periarfissanik Tusass A/S-ip atorluaasarnissaa Naalakkersuisut naatsorsuutigaat. Nassiussat najukkanut ataasiakkaanut nassiussornissaanut Tusass assartuisartunik suleqateqartariaqartarpoq. Tusass A/S-ip nakkutiginnngisaanut taamaasillunilu naammassisinnaanngisaanik Naalakkersuisut piumasaqaateqarneq ajorput allakkalli poortukkallu apuuttarnissaat kiffartuussinissamik isumaqatigiissuteqarfigisimasanut akuttunngitsumik oqaloqatigiissutigisarlugit.

Neriuppunga matuma qulaani apeqqutitit akineqarsimassasut.

Inussiarnersumik Inuulluaqqusillunga



Aqqaluq B. Egede